

1 PITA

A kalanloun tutun te kolotein e Pita

¹ Alia e Pita, a aposol tere Iesu Kristo. Alia e hala menagi a kalanloun teka i tamilimiu u katun tere Sunahan ti tsuga bar i han i tamilimiu me na ka kalakala mia tara man provins i Pontas ni Galesia ni Kapadosia ni Eisia ni Bitinia. ² I manasa koru e Sunahan e Tamarara e atei sil hakapa riou limiu me hopu kap mera nei limiu i tanen. Nu Namnamei i tanen e kato rilimiu u katun i tanen. Taraha, e Sunahan e ngilena alimiu go gogoso meiam u rahatsing tere Iesu Kristo ba te mamaniete men. E Sunahan e tatei tatagi koru rano limiu, ba te hala ranei limiu a masalohana pan.

A ka a niga te hamana sile rara

³⁻⁴ Ara gi hala meni u haniga tere Sunahan e Tamana e Iesu Kristo a Tsunono i tarara. Taraha, nonei e tatagi koru rena ra, na nonei e hatakei mei e Iesu Kristo tara tou mate te go hala merien ra a nitoatoa a tsimus. Na ra e toatoa mera te hamana sile rara a nitoatoa a niga ti haka beri ra i Kolö, a man ka te ma tatei omiri ne ma tatei mulari ne ma tatei taiari. ⁵ Nonei e lu pouts mera nei romana limiu i tanen, na nonei e haruto nena romana a nihitaguahu teka tara kapakapana poata. A nitagala tere Sunahan e hatongo kap rano ra tara nomi tara poata te hamana ria ra. ⁶ Alimiu go sasala meiam a ka teka, noahasina te ka toum mena milimiu a nitatagi tara tsitabubun poata

teka te roron butuna a mamana nomi na kamits i tamilimiu. ⁷ A man torohala teka e torohala tuneri u nihamana i tamilimiu, ba te haruto nena te ga mana uen. A goul has e tatei omina, kaba nori e nas haramune ren turu tula ba te sakier te ga mana uen. Ne kato has uana i iesana, a nihamana i tamilimiu e niga bala nena u goul, kaba e Sunahan e ga torohale ien ba limiu te hamana hatagala lel hasmiu. Ba poata te butu nama romana e Iesu Kristo, be Sunahan te haniga rano limiu ba te solosei rano limiu ba te hapan rano limiu. ⁸ Alimi u namala tare mien, kaba limiu e ngile men. Alimi e ma tara hase mien i romana, kaba limiu e hamana uamiu i tanen. Ba limiu te sasala memiu a nisasala a kapan koru te pan bala nena u ranga te torohalan hatei nanen. ⁹ Alimi e sasala memiu e Sunahan e taguhu rano limiu ba te lu pouts rena u namnamei i tamilimiu, taraha alimi e hamana haniga uamiu i tanen. ¹⁰ U propet i manasa i hatei mamin a hitaguhu teka te ga butuia i tamilimiu, kaba nori i lagi sakesake a mouna a markato te lu pouts mera nei e Sunahan u katun. ¹¹ U Namnamei tere Kristo te kaia i toriren e hatei ren te ga sagoho meni e Kristo a kamits ba te lu hasena romana a nikapan i murinen. Na nori i hiarangrangata sil a ka teka e ga butuia romana teresi na tara saha poata, kaba nori i ma atei hanigai. ¹² Kaba e Sunahan e haruto rien a toukui i taren e ma ka sili te ga taguhu pouts merien, kaba e ka sil te ga taguhu meri limiu. Na man ka teka i habulungana has meni i tamilimiu. E Sunahan e hale iema u Namnamei u Goagono ba te haranga rena u katun ti rarareia u Bulungana

u Niga i tamilimiu. Nu angelo has i ngil korui te gi atei sil menien a man ka teka, kaba nori e ma ateiri.

Ara gi ka mei a nikaka a gogoso

¹³ Alimiу go hamatsköe iam u hakhakats i tamilimiu ba te hakats haniga mia i peisamiu. Hamana nitoa sile iam a nihitaguhu te luemi romana limiu tara poata te butu nama romana e Iesu Kristo.

¹⁴ Alimiу a galapien tere Sunahan go hengoe men. I manasa alimiу u tutu ba niam e Sunahan na limiu u ka meiam u ngil u omi. Kaba limiu e ma tatei kukute lelemi a markato teka. ¹⁵ E moa. E Sunahan te ngö hakapa riu limiu, nonei e goagonona ne niga koruna. Ne kato uana alimiу has e go niga koru iam tara mamana markato i tamilimiu. ¹⁶ Taraha, e Sunahan e mar ranga uana teka turu Buk u Goagono, “Alimiу go niga bala niam a markato a omi, taraha alia e niga bala has negu a markato a omi.” ¹⁷ Alimiу e roron singo uamiu tere Tamamilimiu, nonei te roron tsimou mena nei a man toa toa a man katun a man ka ti katoen ba te ma hakats kalakala ranei a barebanua. E kato uana teka ba limiu te matoutse men ba te hapane men tara mamana poata te ka mia romana limiu i puta. ¹⁸ Alimiу e atei silemiu a ka te sakahis ba rilimiу tara man markato pinopino tu lue mia limiu turu tubumilimiu. E Sunahan e ma sakahis rai limiu a moni tun te tatei taiana.

¹⁹ E moa. Nonei e sakahis rai limiu a tou mate tere Kristo, te la sei ba nena u hihol hoboto. E Kristo e herei a tunan sipsip a niga koru te hats ner ba te moa koruna ta ka ta omi i tanen. ²⁰ E Sunahan e hopu kap nien i mam te habute ien a han i puta, kaba nonei e hagou haruto nen tara

kapakapana poata i romana te ga taguhi rilimiu.
21 Alimi u hamana uamiu tere Sunahan, taraha e Kristo e mate sil rio limiu. E Sunahan e hatakei poutse ien tara tou mate ba te solo sei korue nen. Ba limiu te hamana tala uamiu tere Sunahan ba te alose men te ga taguhu has merien limiu.
22 Alimi u hagogoso hakape iam a torimilimiu tu kukute mena milimiu u ranga u mana, ba limiu te ngil koru tala remiu a pal barebana tere Kristo. Na limiu go mar kato noa has uam teka ba te hiangilngil hatagala lel hasmiu i torimilimiu.
23 Alimi u butu hatsimus hakapa iam, here nei te mar posa menari a pien. Kaba a nitoatoa a tsimus i tamilimiu e ma tuhanaia tara katun tun te antunan mate susuluna. E moa. Alimi u tuhana meiam u ranga tere Sunahan te mana nitoana ne ma tatei kapa nei. **24** U Buk u Goagono e mar ranga uana teka,

“U katun hoboto e hereri u garas, na nikapan i taren e here nei a tsi palaua turu garas.

U garas e tatei langona, ba hua te rusuna.

25 Kaba u ranga tara Tsunono e ka nitoana.”

Nu ranga teka nonei u Bulungana u Niga ti rrararieia i tamilimiu.

2

A hatu a niga

1 Alimi go ba neiam a man ka man omi i peisamilimiu. E moa lel tu ranga na tu markato tu gamo na tu hiomi. Ne moa lel te go ranga homi sil mena milimiu a tai. **2** Alimi go ngil korue iam u ranga u niga tere Sunahan, te mar bes sil mena nei a pien ti hagou posei a sus. Nonei u ranga

teka e taguhu rano limiu ba te katun tangoho susul uamiu romana tara markato turu Namnamei, be Sunahan te lu pouts rano limiu. ³ Taraha, u Buk u Goagono e poiena, “Alimi u ateil sil hakape iam a Tsunono e niga rano limiu.” ⁴ La uamuma tara Tsunono. Nonei e here nei a hatu ti hapiraka ban u katun. Kaba e Sunahan e hopu kap neien nonei a katun te niga bala ba te hala nena a nitoatoa. ⁵ La uamuma i tanen ba te heremi u hatu u niga te kuieri a luman lotu. E Sunahan e ngilin kui ranei limiu a toa luman lotu turu namnamei. Alimi u pris u niga tere Sunahan ba te kui beie men tara nitagala turu Namnamei i tanen. U pris e roron hats merari a man hats a man niga tere Sunahan, ne kato has uana i iesana, e Sunahan e ngilena alimi go hala niam a peisamilimiu i tanen, taraha e Iesu Kristo e mate sil rio limiu. ⁶ E Sunahan e poiena turu Buk u Goagono,

“Tara. Alia e hake goa romana i han i Saion a hatu a niga te niga balana tara toukuina tara luma.

Bu katun te hamana ria romana i tanen e ma tapusun hamana roi.”

⁷ A hatu teka e haharoei nena e Iesu. Nonei e taguhu koru rano limiu u katun te hamanamiu. Kaba turu katun te ma hamanari, u ranga e kato uana,

“A hatu ti hapiraka ban u katunun kukui luma, nonei a hatu te niga balana tara toukuina tara luma.”

⁸ Na tana makum turu Buk u Goagono e poe hasena,

“Nonei a hatu teka te tutu ranoa romana u katun.”

U katun te tutu rena tara hatu e haharoei ner u katun te tori-soaler e Iesu, taraha nori e ma kukutieri u ranga. E Sunahan e mar ranga u teka i manasa te gi mar kato uen teka. ⁹ Kaba limiu a pal katun te hopu kapir e Sunahan, u pris tara King. Alimi a hun katun a gogoso tere Sunahan ti hopu kap merai te go habulungana menami a man toukui a man niga i tanen, nonei te ngö rema limiu turu kuhil me la uami turu ualesala u niga i tanen. ¹⁰ I manasa alimi u ma katun uami tere Sunahan, kaba i romana alimi u katun i tanen. I manasa alimi u ma atei silemi te tatagi mera nei e Sunahan u katun, kaba i romana alimi e atei silemi e Sunahan e tatagi rano limiu.

U katunun kui tere Sunahan

¹¹ A ma tsomi, alimi e heremi u katunun hulala tun i puta, na limiu e ke iemiu a tsitabubun poata turu tsiktsiki teka. Na lia e ranga hatatagi mera gilimiu, alimi go ma rongarongemi a peisamilimiu te go kato meni a man ngil a man omi, u ngil te roron hiatatung mena u namnamei i tamilimiu. ¹² Alimi e go kato haniga talasi mia i gusur u katun te hahamanar. Ba poata te ranga homi rien i tamilimiu ba te poier alimi e katoemiu a markato a omi, ba nori te tatei tarer a markato a niga te go katoam limiu, ba te soloseier e Sunahan tara poata te la namen romana. ¹³⁻¹⁴ Alimi go kukute iam u ngil tara Tsunono ba te haka pute iemiu a peisamilimiu turu katun hoboto te pan ria i tamilimiu. Alimi go ka puta mia tara Gamman Pan te pan koruna i tamilimiu, na turu gamman

u tetenei has te hala merien te gi hahuna meri u katun te kato homir ba te solosei rer u katun te kato hanigar. ¹⁵ Taraha, e Sunahan e ngilena alimi u go kato haniga iam ba te kato hahalongolo remiu u katun u tutu te raranga homi sil rario limiu. ¹⁶ Alimi u go mar kato uam te kato uana a katun te tapurese ban a karabus. Kaba limiu e ma tapurese silemi te go kato homi uam limiu. E moa. Alimi e tapurese silemi te go katunun kui uam tere Sunahan. ¹⁷ Hapan riam u katun hoboto. Ngil riam u katun te hamana gono mera rio limiu tere Kristo. Matoutse iam e Sunahan, ba te hapanemiu a Gamman Pan.

U haharoei tara nikamits tere Kristo

¹⁸ Alimi u katunun kui e go haka pute iam a peisamilimi turu katun pan i tamilimi ba te hatara ramien te hatsunono hamana mera mien limiu, noahasina te hatami mera rien limiu tsi te ranga hamal rien i tamilimi. ¹⁹ Te ngilin katoe mia limiu u ngil tere Sunahan ba limiu te sagoho kamits puku noa hasmiu, e Sunahan e haniga rano limiu. ²⁰ Te go katoe mia limiu ta markato ta omi ba nori te singata rario limiu ba limiu te hasingata tun ramen, e moa te gi solosei meri limiu tara ka teka. Kaba te go katoe mia limiu ta markato ta niga ba nori te hakamits noa has rario limiu tara markato teka ba limiu te ma ranga palismi, be Sunahan te haniga rano limiu. ²¹ E Sunahan e ngö hakapa riu limiu te go kato mena milimi a markato teka. Taraha, e Kristo has e kamits hakapa sil riu limiu, na ka teka e haharoei nena te go la has uam limiu tara maroro teka i tanen. ²² Nonei e ma katoe ta markato ta omi.

E moa tu toa tu gamo te ga butuma i rungnen.
²³ Nori i hahakosia i tanen kaba nonei e ma palisei u hahakos. Tara poata te kamits ien, nonei e ma torohanhan palisei a kamits i tanen. Kaba nonei e sola meni a peisanen tere Sunahan te tsimou hamatsköena a mamana ka. ²⁴ E Kristo noa has te soata meni u markato u omi i tarara i peisanen te mate ien tara koruse. E mar kato u teka te gi here meni ra u katun ti mate ban u markato u omi ba te toatoa silera a markato a matskö. Nonei e lu sili a man ngats na man takiraha te gi niga pouts ba meni ra u markato u omi. ²⁵ Alimi u heremi u sipsip ti hatutu a maroro i taren. Kaba alimi u la pouts hakapa uamuma tere Sunahan te taratara kap nena u namnamei i tamilimiu.

3

A man munmun tahol

¹⁻² Na tara markato tara nikaka haniga hoboto, alimi u tohaliou e go haka pute mia a peisamilimiu tara pal tson i tamilimiu. Na sanena a palai i taren e gi ma hamanei u ranga tere Sunahan, nori e tatei hamana noa has mer te tara mena rien a markato a niga i tamilimiu. Te ma katoe milimiu tu toa tu ranga i taren, a palai e tatei hamana noa hasir, taraha nori e tare riou te kato mena milimiu a markato a gogoso na markato te hapan mena milimiu a Tsunono. ³ Alimi u go ma hakats hapara nami te go hataratara haniga koru menami a peisamilimiu i ielesala ba te roron herokoemiu u hulu ba te hamagoemiu u beroana nu kabono te hol seina ba te roron hasobuemiu u hasobu u niga. E moa. ⁴ A nitaratara a niga i tamilimiu e ga butuma i iogana i torimilimiu

te ka mena milimi u tori kokomoto ba te roron hahatamiemiu u katun. A markato teka e ma hula palis nei. E ka nitoana, ne Sunahan e haniga koruen. ⁵ A tohaliou u niga i manasa ti hamana u tere Sunahan i tori has u teka ba te haka pute ria a peisaren tara pal tson i taren. ⁶ E Sera e mar kato has u teka. Nonei e hengo korui a tson i tanen e Abraham me ngöe neien “A tsunono i tar.” Na limiu e here hamanasemi a galapien tohaliou i tanen te go kato haniga uam limiu ba te ma matoutemi ta ka. ⁷ Alimiu has a pal tson, alimiu go hakats haniga niam a tohaliou i tamilimi, taraha a tahol e ma tagala uanei te mar tagala uana a tson i tanen. Na limiu go hapan has ramen, taraha nori has e lu gono mera roi romana limiu a nitoatoa tere Sunahan. Alimiu go mar kato uam teka, taraha ta ka e namos kato homiena a tou singo i tamilimi.

A kamits te lu pukue ier tara markato a niga

⁸ U ranga teka e la uana i tamilimi hoboto. Alimiu go ka meiam u toa u hakats ba te hiatatatagimiu. Alimiu go hiangilngil iam te hamana hoboto here mena milimi u munmun toulana tere Kristo. Ba limiu te tami mia tara tai ba te haka putemiu a peisamilimi. ⁹ Alimiu go ma hipou nami u markato u omi te kato rari limiu, na limiu go ma hipou has nami u korupakö. E nigana te go hamatana mena milimi a nikalala, taraha a nikalala nonei a ka te rangein e Sunahan te ga hala rien limiu tara poata te ngö rien limiu. ¹⁰ Te mar ranga uana u Buk u Goagono,

“A katun te ngil koruena a nitoatoa ba te ngilin ka mena a nitoatoa a niga, a katun teka e moa

te ga ranga homi uen.

Nonei e ga hanoan rangein u gamo.

¹¹ Nonei e ga habirts ban u markato u omi ba te kato hanigana.

Nonei e ga ngil korui a markato tara masalohana ba te kukute hatagala korue nen.

¹² Taraha, a Tsunono e roron tara uana turu katun u matskö ba te roron hengona turu singo i taren.

Kaba nonei e raharaha rena u katun te kato homir." ¹³ E moa ta katun ta para te gi homi meri limiu te go kato hatagala sil mena milimiui a markato a niga. ¹⁴ Kaba te go kamits noa has mena milimiui te kato mena milimiui a markato a niga, e Sunahan e kalala has rano romana limiu! Ma matout rami u katun teka, na limiu go ma tatei tokumi. E moa. ¹⁵ Alimiui go hapane iam e Kristo i torimiliui, ba te katoe mien a Tsunono i tamiliui. Tara mamana poata alimiui go hanei sile iam ta katun te go rangata rilimiui a ka te hamana sile milimiui, ba limiu te ranga palise mien u rangan hatami ba te ma sigale mien. ¹⁶ Na limiu go mar kato haniga uam te ga ma tatei kot meri u torimiliui alimiui. Bu katun te ranga homi ner u markato u niga i tamiliui te kukute mena milimiui e Kristo te tatei matsingolo mer romana u ranga u omi i taren. ¹⁷ Taraha, te ga ngilia e Sunahan te lu mena milimiui a kamits, e niga balana te go kamits mena milimiui a markato a niga ba te ma kamits memi tu kato mena milimiui a markato a omi. ¹⁸⁻¹⁹ Taraha, e Kristo e sagoho hasi a

kamits ba te mate silena u markato u omi i tarara. Nonei e mate a toa puku a poata ba te ma tatei mate lel nei. Nonei a katun a niga te mate silir u katun u omi. E kato sil te ga peigi merien ra tere Sunahan. A tuanreinen e mate, kaba nonei e toatoa mei a markato turu namnamei, ba te na rarariena u ranga tara man namnamei ti kaia tara makumun kits. ²⁰ A man namnamei teka nori u katun u hihipus ti kaia tara poata tere Noa i manasa. Nonei tara poata e Sunahan e solon hahaloso ba te tuatami koruna tara poata te kukui meni e Noa a tolala. Kaba a eliel puku a katun ti toatoa silaia turu uolo pan te kato hamatir a palair u katun hoboto. ²¹ U uolo e haharoei nena a tou baptais i tarara. U uolo e taguhir a pala tere Noa, na tou baptais e taguhu has rano ra. E ma ka sile nei te ga galus ba meni u korkoriana turu tuanrei tun i tarara. E moa. A tou baptais i tarara e mouna uana ara e hateie rei e Sunahan ara e ma sabie rei ta ka ta omi i tarara. Ara e tatei mar kato uara teka, taraha e Sunahan e hatakei poutsi e Iesu Kristo tara tou mate. ²² Ne Kristo e la hakapa u i Kolö me na kana tara pal matou tere Sunahan. Nonei e tsunono rena u angelo na pal kapan na nitagala hoboto i Kolö.

4

A markato a tsumis

¹ E Kristo e sagohi a kamits i tuanreinen, na limiu go mar hakats hatagala has uam i iesana ba te ma rama nami a tou kamits. Taraha, a katun

te kamkamitsina i tuanreinen e ma hakats nanei te ga kato menien a markato a omi.² E kato uana teka ba limiu te ma tatei kato lel uami te ngil uana u ngilina i puta. E moa. Tara man lan hoboto te ka noa mia romana limiu i puta, alimiui go kato talasi uam te ngil uana e Sunahan.³ A man poata i manasa e antuna hakapa tu katoe mia limiu u markato u omi te roron ngiler u katun te hahamanar. Alimiui u rongaronge iam a peisamilimi turu ngil u omi ba te uaua pala mia turu pati u omi ba te tutu memiu u ramun u tagala, na limiu u hatsunono homi hase iam u keisa. Alimiui u mar kato uam teka i manasa kaba i romana e moa.⁴ Ba pala te hahamanar e asingoto hamanaso ner te ma kato lel gono mera mien limiu a man markaton rongaronga pinopino teka, ba nori te ranga homi rario limiu.⁵ Kaba i murimuri nori e tatei ranga peisa ner romana a man mouna a man markato ti katoen te tuol rien romana i matane Sunahan, nonei te hahalonson tsimou ranou u katun te toatoar nu katun ti mate.⁶ Nonei a ka ti rarare bei u Bulungana u Niga turu katun ti mate, te go tatei toatoa u a namnamei i taren te mar toatoa uana e Sunahan, noahasina ti mate u a tuanreiren te mar mate uar u katun.

Tara kap haniga niam a man nitagala te hala rilimi u Sunahan

⁷ A nikapakapa tara mamana ka e susuku hakapa. Nonei te go hakats halesala haniga beiam limiu ba te hakats haniga mia i peisamiu ba limiu te tatei singo uamiu tere Sunahan.⁸ A ka te pan koruna tara mamana ka, alimiui go hiangilngil hatagala iam, taraha u ngilngil e kato hataie iena a markato a omi a para.⁹ Alimiui go ngö merami

a palai i luma i tamilimiu, ba te sasala memiu a markato teka. ¹⁰ Alimi u a man toa toa hoboto u lu hakape mumu a nitagala a niga tere Sunahan. Na limiu go tara kap haniga niam a man nitagala teka ba te taguhu ramiu u palai. ¹¹ A katun te ka mena a nitagala te ga rarare haniga meni u ranga e ga rararei u ranga tere Sunahan. Na katun te roron hitaguhuna e ga hitaguhu mei a nitagala te lue ien tere Sunahan, ba tara mamana ka a solone Sunahan e hala sei sila naroa tere Iesu Kristo, nonei te ka nitoa mena a nikapan na nitagala tara mamana poata. U mana.

U kamits te sagoher u Kristen

¹² A ma tsomi i tar, alimi u go ma asingoto nami a kamits pan te butu silena te ga torohala meri limiu. Alimi u go ma poemi, “A ka halhal a omi e butuna i tarara.” E moa. ¹³ Alimi u go sasala iam, taraha e here nei alimi e sagoho gono memi e Kristo a kamits. Nonei te go tatei sasala koru bei iam limiu romana tara poata te butu mena men romana a nikapan i tanen. ¹⁴ Alimi u go sasala iam te gi ranga homi merai limiu te kukute mena milimiu e Kristo, taraha a ka teka e poiena u Namnamei u tagala tere Sunahan e kana i tamilimiu. ¹⁵ Kaba ta toa i tamilimiu e namos atung hamati ena ta katun, ne namos kopuna, ne namos torohan an herokoena a toukui tara tana katun, ne namos katoena a tana markato a omi. Te sagoho kamits sile mia limiu a man ka teka, e matsköna. ¹⁶ Kaba te go kamits uam limiu te kukute mena milimiu e Kristo, ma matsingolo memien. E moa. Alimi u go haniga uam tere Sunahan te ka mena milimiu u solon “Kristen”.

¹⁷ A poata te ga hatanian tsimou meri e Sunahan u katun e butu hakapa, na nonei e tsimou mam ranou u katun i tanen. Na te hatania nen romana i tarara, nonei e na kapa mena romana a nihahuna pan turu katun te hipus ner u Bulungana u Niga i tanen. ¹⁸ Te mar ranga uana u Buk u Goagono, “E ka mena a toukui pan te gi lu pouts meri u katun u matskö.

Gime te la uar romana u katun u omi te ma hapaneri e Sunahan? Tara han a omi koru!”

¹⁹ Ba te kato uana, te kamits memia limiu u ngil tere Sunahan, ba limiu te kato haniga noa hasmiu ba te hasola mia tere Sunahan te habutu riu limiu. Nonei e roron kato hamanena u ranga i tanen.

5

Usipsip tere Sunahan

¹⁻² Alia e ka megu u ranga tara pal kapan i tamiliimu te tara kap ner u lotu. Alia has a katun pan turu lotu i tarara. Alia u ruto hakapi te kamitsia e Kristo na lia e lu gono has megoen romana a nikapan tara poata te butu namen romana. Alia e ranga hatatagi mera golimiu, alimiuk go taratara kap haniga riam u katun te hala rilimiu e Sunahan. Nori e hereri u sipsip na limiu u katunun taratarakap i taren. Alimiuk go ma kato memi a toukui teka te hakui tun mera nei e Sunahan alimiuk. E moa. Alimiuk go ka meiam u ngilngil i peisamilimiu ba te katoe men. Alimiuk go ma kato sile mien te go lu mena milimiu ta moni. E moa. Alimiuk go ngil hatagala tune men. ³ Ma hamal rami u katun te taratara kap rami limiu. E moa.

Alimiу go kato menami a markato a niga te tatei tatatie ren. ⁴ Ba tara poata te butu nama romana a katun a kapan turu katunun taratarakap, ba limiu te luemiu romana a praisina i Kolö te ma tatei taia nei. ⁵ Ne kato has uana i iesana, alimiу u katun u hitots e go hala pute iam a peisamilimiу turu katun u kapan. Na limiu hoboto e go hatetenei iam a peisamilimiу ba te hihitaguhimiу. Taraha, u Buk u Goagono e poiena, “E Sunahan e tokitoki rena u katun te hangiser, kaba nonei e taguhu rena u katun te hateteneier a peisaren.” ⁶ Ba limiu te hatetenei talemiу a peisamilimiу ba te ka puta mia tara nitagala tere Sunahan, ba tara poata a matskö ba nonei te hala sei has rano romana limiu. ⁷ Haka menami a nitatagi hoboto i tamilimiу i tanen, taraha nonei te tara kap rano limiu. ⁸ Alimiу go hakats haniga mia i peisamiu ne go hanei haniga iam! Taraha, a pakö i tamilimiу e Satan e roron hula lana ba te sakiена ta katun te ga kato homien. E here nei a ka a hie a kapan te ngöeri a laion te ngala homina ba te sakiена ta ka ta toatoa te ga nouen. ⁹ Ka hatagala mia turu hamana i tamilimiу ba te tuol kakap nemiu e Satan, taraha u toulamilimiу u Kristen te ka ria tara mamana han i puta e sagoho haser a toa mar kamits te sagohe milimiу. ¹⁰ Alimiу e gamon sagoho lele mou a kamits, kaba i murinen e Sunahan e kato ranoi limiu u katun u tangoho i tanen ba te haka hakarapoto rano limiu ba te hatagala rano limiu. Nonei a Sunahan te roron tatagi rano limiu ba te ngö sil ranei limiu te go lu gono memi limiu e Kristo a nikapan i tanen te ka nitoana. ¹¹ E Sunahan te ka nitoa mena a nitagala

pan tara mamana poata. U mana.

Urangan haniga

¹² E Silbenes e koloto benei lia a tsi kalanloun teka te hala mena gilia i tamilimi. Nonei e toularara tara markato turu Kristen na lia e hamana korue gen. Tara kalanloun teka alia e hala mera gilimi u rangan hitaguhu ba te hatei ragi limiu nonei a nihitaguhu hamana tere Sunahan teka. Na limiu go ka hakarapoto mia tara markato tara nihitaguhu teka. ¹³ A pal Kristen te ka ria tara taun teka i Bebilon na te hopu kap hasir e Sunahan, nori e hatsomi uar i tamilimi. Na pien i tar e Mak e hala has ranoi limiu u haniga. ¹⁴ Hiahahatsomi meiam u ngilngil hamana. Na masalohana e tatei ka gono mera nolimiu hoboto u katun tere Kristo. Nonei talasi.

Alia e Pita

U BULUNGANA U NIGA
The New Testament in the Halia Language of Papua
New Guinea
Nupela Testamen long tokples Halia long Niugini

copyright © 2020 Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

PDF generated using Haiola and XeLaTeX on 21 Feb 2024 from source files
dated 31 Aug 2023

03815460-d6a0-5a59-aa7b-2a4278f7e67d